

C O N I L



CONIL, præclarum Hispaniæ oppidulum, sex miliaribus à Gaditano oppido, qua meridiem respicit, distans, primo abest lapide à regia via, qua ad fretum Herculeum, siue stritum de Zibaltar deuenitur. Illustrissimo S. Lucæ Duci, qui & Medina Cidonia, paret. Eius præcipua salus atq; diuitiæ, in captura variorum piscium, potissimum verò tynnorum consistunt. Quæ Duci maximo est emolumento, nam ferè centum coronatorum millia annuatim hinc eum colligere afferunt. Locus piscationi bonitate naturæ destinatus, quemadmodum etiam in vicino oppido Cadiz, Almodraua vulgò dicitur, in quo quæstuosam hanc piscationem à Calendis Maij, ad decimum quintum Iunij diem exercent. Arx ibidem est, domicilium Duci præbens, iuxta quam domus est amplissima, La chauca de Ducque cognominata, ex qua pisces minutim dissecti, & sale in vasculis conditi, onerarijs nauibus incredibili copia in Italiam deferuntur, atque in mediterraneo mari, ac passim in Galeis totius anni tempore esui sunt. Earum nauium, quæ quotannis hinc deferunt piscem, statio eo loco est, qui litera C. in lamina notatus videtur. In proximo Cymbarum multitudo ferè semper consistit, quibus retia in Mare, dum tynnis insidiantur, deferunt, quæ & apud eum, qui in icone conspicitur, rinulum, dum à piscatione redeunt, vuida explicant, reficiunt, atq; exsiccant. Illud verò quibusdam fortè mirum videbitur, quonam pacto præcelsæ turris, litera E. designatæ, & vulgò, Torre de Attalaya dictæ, adminiculo, in isto piscatu, vtantur. Speculator in ea, dum hi pisces Cymbarum atq; lemborum multitudine sectantur, constitutus, longius tynnorum aduentum conspiciens (se ipsos etenim, dum gregatim tranquillo Mari, dorso eminentes adnatant, patefaciunt) candido velo dat piscatoribus signa, visitata & cognita ipsis indicia, quibus cognoscunt, quousque ipsis progrediendum, & retia prouehenda, quando item ea in mare sint demittenda. Est & alia nocticula turris, litera D. insignita. In ea nocturno tempore Turcarum, Maurorum, & aliorum hostium aduentantium explorator agit, qui ignitis, & in vniuerso isto Hispaniæ tractu visitatis indicijs, speculatores in proximis constitutos excubijs, de hostium aduentu admonet, & hi consequenter alios, vnde vicina deinde oppida, quam minimo tempore, vigilandum & prospiciendum sibi esse accipiunt.

X E R E S D E L A F R O N T E R A .



XERES, vrbs inclyta in Andalusia Hispaniæ regione sita, duabus miliaribus à celebri nauium statione, amploque B. Mariæ portu distat, qua consueta Cadizium vsque, duarum leucarum nauigatio suscipitur, quæ vulgari lingua, De Bay von Cadiz, hoc est, Caditana nauigatio nuncupatur. Et quia hæc Vrbs, omnium primum muris, foueis, & turribus septa, in ista Hispaniæ regione se offert, De la Frontera, quasi Hispaniæ ex hac ora initium, siue etiam terminus dicitur. Magnitudine loci, amplissimoq; murorum ambitu conspicua. Illustribus natalium splendore, nobilibusque viris domicilia præbet. Qui celebri frequenti que numero eam incolunt, agrumque vicinum, ex quo per ingentes commoditates percipiunt, latissimo spatio occupant. Is ager, vineis & aruis distinctus, omnium frugum, vini, olei & frumenti ferax, adeò, vt quasi perpetuo vere, perenni viriditate vis decenter ornatus, variaque segete campi, quouis etiam tempore, supra hominum fidem, luxuriet. laxissima demum prata, graminum & florum viriditate contexta atque vestita spectantes reficiant. Ita quidem, vt nulla soli portio otiosa, nullus planè locus, tantum publicis exceptis, inueniatur, quem non aut virium vbertas ac varietas, aut ramosa arbores præstantissimis fructibus graues exornent. Eiusmodi sanè vicini agri conditio est: tanta in eo elegantia, nitor atque vbertas conspicitur, vt vix eam referenti fides adhibenda putetur. Quare mirandum minimè est, cum olim, tum hac nostra quoque ætate, summos, nobilesque homines in ea potissimum vrbe domiciliū sibi delegisse. Inde præclara vina, quæ ab Indicis vsq; gentibus expetuntur, in inferiorem Germaniam, Galliam, Angliam, Scotiam, Ostlandiam, & in alias totius vniuersi Regionis quotannis exportantur. Inde Anno A. C. N. M. D. L. X. V. cum graui caritate annonæ Germania infligeretur, incredibili frumenti copia, egestate & inedia pressis subuentum est. Immensæ etiam altitudinis puteos sub terra, ad rem frumentariam multos in annos conseruandam, in hac vrbe passim nobiles habent, infra quidem latos, angustiores autem supernè, lapidum mole contextos, quos sine peculiari Magistratus consensu aperire non licet. Tantam vini copiam huius vrbs territorium annuo prouentu cultoribus profert, vt sexaginta millia vasa, quorum singula tres amas, sua capacitate absorbent, vix ad hoc vinum conseruandum sufficiant, compertumque sit quandoque, vt is doliorum numerus, octuaginta millia excederet. Præstantissimos insuper totius Hispaniæ equos, & maximè pernices hæc regio profert, eos Genettas vulgò nuncupant, quos nobiles mira industria informant, eorumque cursu in hippodromis oblectantur, dum equestres instituunt pugnas, in quibus arundinibus & cannis, hastarum loco, sese mutuo exercent, eum ad modum, quo Mauri hastas torquere, & iacere in hostes solent. Eos ludos, Fuegos de cannas, patria lingua nuncupant.